



***Komunikadu Imprensa  
Tribunál Distritál Dili  
17 Fevereiru 2015***

## **Desizaun tribunál ne'ebé sensível asegura prevensaun krime violénsia doméstika iha futuru**

Iha 10 Fevereiru 2015, Tribunál Distritál Dili preside leitura sentensa no kondena arguidu JdS tanba prátika krime violénsia doméstika hasoru nia feen, iha distritu Dili.

Tribunál prova katak iha 23 Dezembru 2014 kalan, arguidu dudu lezada nia ulun kona iha aikama nian. Kazu ne'e akontese tanba arguidu ba sosa sasan fila kalan no lao hamutuk ho fetonain rua tanba kareta laiha, tanba ne'e mak lezada hirus.

Tuir mai iha 24 Dezembru 2014 dader, arguidu kaer lezada nia ulun tuku ba parede no kauza lezada nia ulun bubu, wainhira lezada tanis arguidu buti lezada niaibun, atu lian labele sai. Arguidu mós lori tizora fai iha lezada nia orgaun seksuál, maske la hetan kanek no ran, maibé kauza lezada sente moras no mean iha fatin ne'ebé arguidu fai. Kazu ne'e akontese tanba lezada diskunfia fetonain rua ne'ebé lao hamutuk ne'e arguidu nia namorada.

Ministériu Públiku akuza arguidu kontra artigu 145 Kódigu Penál konjuga ho artigu 35 Lei Kontra Violénsia Doméstika.

“Aktu ne'e konstitui nu'udar krime maus tratus ba kónjuje, tanba ne'e JSMP hanoin katak kazu ne'e apropriadu liu akuza ho maus-tratus ba kónjuje duke ofensa ba integridade fizika simple”, dehan Luis de Oliveira Sampaio, Diretór Ezekutivu JSMP.

Iha julgamentu arguidu hili direitu silensiu no tribunál kontinua rona deklarasaun lezada. Iha lezada nia depoimentu kontinua mantein faktus sira iha akuzasaun. Iha oportunidade ikus iha audiénsia, arguidu konfirma fali faktus husi akuzasaun no deklara katak la'os hodi tizora ho intensaun fai lezada nia orgaun seksuál, tanba arguidu ho lezada dudu malu mak tizora kona lezada.

Iha alegasaun finál, ministériu públiku hare katak faktus hotu ne'ebé konsta iha akuzasaun provadu, bazeia ba deklarasaun hosi lezada nian. Ministériu Públiku hanoin katak atu halo

Rua setubal, Colmera, Dili Timor Leste

PoBox: 275

Telefone: 3323883 | 77295795

[www.jsmp.tl](http://www.jsmp.tl)

[info@jsmp.minihub.org](mailto:info@jsmp.minihub.org)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl

prevensaun ba krime ne'e, suspensaun mak nesesariu, tanba ne'e husu ba tribunál kondena arguidu ho pena prizaun tinan 1 suspende ba tinan 2. Enkuantu defeza husu ba tribunál atu fó justisa ba arguidu.

Tribunál konsidera katak violénsia bazeia ba jéneru nu'udar aktus krime ne'ebé kontra lei Timor Leste no lei internasionál ne'ebé estadu ratifika. Tribunál halo referensia ba Konstituisaun artigu 16 kona-ba universalidade no igualidade, artigu 17 kona-ba igualidade kona-ba feto ho mane, konjuga mós ho artigu 1, 2 no 5 husi Konvensaun kona-ba halakon forma diskriminasaun hasoru feto.

Tribunál prova katak arguidu basa lezada, tuku ulun ba parede, buti lezada niaibun no lori tizora fai lezada nia orgaun seksuál, arguidu nia hahalok ne'e fo perigu ba lezada nia vida no kontra dignidade umanu.

Husi faktus hirak ne'e, tribunál konklui kondena arguidu ho pena prizaun tinan 2 suspende ba tinan 5 no apresentasaun periodika kada fulan durante tinan 3.

JSMP kongratula desizaun tribunál, tanba fó konsiderasaun ba artigu sira ne'ebé mak konsta iha Konstituisaun no Konvensaun internasionál kona-ba violénsia bazeia ba jéneru. Ne'e hanesan pasu pozitivu ida iha desizaun ba kazu violénsia doméstika.

JSMP mós apresia desizaun tribunál tanba rekoñese katak krime ne'e iha impaktu ne'ebé sériu ba lezada. Mezmu kazu ne'e arguidu hetan deit pena suspensaun maibe tribunál aplika mós dever adisionál seluk ne'ebé mak arguidu tenke kumpri durante suspensaun ne'e.

Tuir observasaun JSMP durante ne'e, ba kazu ofensas integridade fisika simples ho natureza violénsia doméstika pela primeravez tribunál suspende pena prizaun to'o tinan 5. Maibe, JSMP rekomenda katak iha futuru iha kazu hanesan ne'e ne'ebé grave, tribunál konsidera pena prizaun ne'ebé la iha suspensaun. JSMP hanoin katak iha kazu violénsia doméstika dala ruma presiza kondena ne'ebé makaas hodi autór krime sei la komete tan krime hanesan iha futuru.

Kazu ne'e rejista iha tribunál ho Nú. Prosesu: 169/2014/TDDIL. Julgamentu ba kazu ne'e prejide hosi Dra. Jacinta Correia da Costa, Ministériu Públiku reprezenta hosi Dr. Vicente Brito no arguidu hetan defeza husi Dr. Manuel Exposto husi Defensória Públiku.

Atu hetan informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
telefone: 3323883/77295795